

Հավելված N1

ՀՀ պետական եկամուտների կոմիտեի նախագահի

«05» հունիսի 2023թ. N560-Լ հրամանի

05100011/010823/713

**ՀՀ ՊԵՏԱԿԱՆ ԵԿԱՄՈՒՏՆԵՐԻ ԿՈՄԻՏԵԻ ԱՐԵՎՄՏՅԱՆ
ՄԱՔՍԱՏՈՒՆ ՎԱՐՉՈՒԹՅՈՒՆ
ՎԱՐՉԱԿԱՆ ՏՈՒՅԺ ՆՇԱՆԱԿԵԼՈՒ ՄԱՍԻՆ**

«01» օգոստոսի 2023թ.

ք. Երևան

Ես՝ ՀՀ պետական եկամուտների կոմիտեի Արևմտյան մաքսատուն-վարչության պետ Գարիկ Մինասյանս, քննելով քաղաքացի Սամվել Հարությունի Շիրինյանի (անձնագիր՝ BA1363505, հասցե՝ ՀՀ, ք. Երևան, Կոմիտաս 562., բն. 28) կողմից մաքսային կանոնների խախտում կատարելու վերաբերյալ նյութերը,

Պ Ա Ր Զ Ե Ց՝

Սույն թվականի հուլիսի 18-ին Ստամբուլ-Երևան PC550 չվերթով ՀՀ է ժամանել քաղաքացի Սամվել Հարությունի Շիրինյանը և մուտք գործելով «Զվարթնոց» միջազգային օդանավակայանի մաքսային հսկողության գոտի՝ ընտրել է մաքսային հսկողության երկուղի համակարգի «Կանաչ ուղի» ընթացակարգը: ՀՀ ՊԵԿ Արևմտյան մաքսատուն-վարչության ՈՒՄՀԲ մաքսային ծառայողները քաղաքացի Սամվել Հարությունի Շիրինյանի կողմից տեղափոխվող ուղեբեռների՝ այդ թվում ձեռքի ուղեբեռի, նկատմամբ մաքսային հսկողության իրականացնելու նպատակով, ցանկացել են վերջինիս ուղեկցել մաքսային հսկողության «Կարմիր ուղու» գոտի: Մաքսային ծառայողների կողմից մաքսային հսկողության «Կարմիր ուղու» գոտի ուղեկցվելու և ուղեբեռների նկատմամբ մաքսային հսկողություն անցկացնելու մասին համապատասխան պահանջ ստանալուց հետո՝ Սամվել Հարությունի Շիրինյանը դրսևորել է բացահայտ անհարգալից վերաբերմունք, հրաժարվել է կատարել մաքսային մարմնի պաշտոնատար անձի մաքսային ոլորտին վերաբերող օրինական պահանջը, հրել է իր կողմից տեղափոխվող ուղեբեռները դեպի մաքսային հսկողության «Կարմիր ուղու» գոտու տարածք և, թողնելով նշված ուղեբեռները՝ 2 տեղ, 32,5կգ (պիտակ N05231P133075) մաքսային հսկողության գոտում, չկատարելով մաքսային մարմնի պաշտոնատար անձի՝ մաքսային ոլորտին վերաբերող օրինական պահանջը, չներկայացնելով որևէ փաստաթուղթ, որոշ ժամանակ անց հեռացել է մաքսային հսկողության գոտուց:

18.07.2023թ-ին մաքսային մարմնի կողմից կազմվել է մաքսային կանոնների խախտման վերաբերյալ թիվ 05100018/180723/10 ՈՒՄՀԲ արձանագրությունը (այսուհետ՝ Արձանագրություն)՝ «Մաքսային կարգավորման մասին» ՀՀ օրենքի 302-րդ հոդվածի 2-րդ մասի հատկանիշներով, այն է՝ Մաքսային մարմնի պաշտոնատար անձի՝ մաքսային ոլորտին վերաբերող օրինական պահանջը չկատարելը:

Ղեկավարվելով «Մաքսային կարգավորման մասին» ՀՀ օրենքի 325-րդ հոդվածի 6-րդ մասով՝ մաքսային կանոնների խախտման վերաբերյալ արձանագրության երկրորդ օրինակը 19.07.2023թ-ին առձեռն հանձնվել է Սամվել Հարությունի Շիրինյանին:

01.08.2023թ-ին վարչական գործով հրավիրվել են խումներ, որի վերաբերյալ Սամվել Հարությունի Շիրինյանը պատշաճ ծանուցվել է և ապահովել է իր ներկայությունը վարչական գործով հրավիրված խումներին:

Վարչական գործով հրավիրված խումներին Սամվել Հարությունի Շիրինյանը բացատրություն է տվել այն մասին, որ 20 ժամ տևողությամբ ճանապարհից հետո ինքը հոգնած է եղել և հրաժարվել է կատարել մաքսային ծառայողի պահանջները: Սամվել Հարությունի Շիրինյանը հայտնել է նաև, որ մաքսային ծառայողները պնդել են, որ վերջինս պարտավոր է կատարել իրենց պահանջները, սակայն ինքն այնքան է բարկացած եղել, որ ոչնչի մասին չի մտածել: Սամվել Հարությունի Շիրինյանը նաև պնդել է, որ մաքսային հսկողության գոտում իր կողմից թողնված ուսապարկում առկա են իրեն պատկանող դեղեր և 3350 Եվրո գումար:

Սամվել Հարությունի Շիրինյանը նշել է, որ իր ծանուցման հասցեն ՀՀ, ք. Երևան, Կոմիտաս 562., բն. 28-ն է, իսկ ուսապարկում առկա իրերի համար վերջինիս կողմից 20.07.2023թ-ին ներկայացվել է թիվ 05100018/200723/0000001502 ուղևորային մաքսային հայտարարագիրը:

ԵԱՏՄ մաքսային օրենսգրքի (այսուհետ՝ նաև Օրենսգիրք) 255-րդ հոդվածի 3-րդ պարբերության համաձայն՝ «երկուրդի համակարգը»՝ մաքսային հսկողության իրականացման պարզեցված համակարգ է, որը թույլ է տալիս Միության մաքսային սահմանով ուղևորվող ֆիզիկական անձանց իրականացնել «կարմիր» և «կանաչ» ուղիների միջև ինքնուրույն ընտրություն:

Օրենսգրքի 257-րդ հոդվածի 1-ին կետի համաձայն՝ «Կանաչ» ուղին Միության մաքսային սահմանով տեղափոխման վայրերում հատուկ նշված վայր է, որը նախատեսված է Միության մաքսային սահմանով ուղեկցվող ուղեբեռում անձնական օգտագործման այնպիսի ապրանքների տեղափոխման համար, որոնք ենթակա չեն մաքսային հայտարարագրման:

«Կարմիր» ուղին Միության մաքսային սահմանով ապրանքների տեղափոխման վայրերում հատուկ նշված վայր է, որը նախատեսված է Միության մաքսային սահմանով ուղեկցվող ուղեբեռում անձնական օգտագործման այնպիսի ապրանքներ տեղափոխելու համար, որոնք ենթակա են մաքսային հայտարարագրման, ինչպես նաև այնպիսի ապրանքներ, որոնց նկատմամբ իրականացվում է մաքսային հայտարարագրում՝ ֆիզիկական անձի ցանկությամբ:

«Մաքսային կարգավորման մասին» ՀՀ օրենքի 220-րդ հոդվածի 1-ին մասի համաձայն՝ մաքսային մարմինների և դրանց պաշտոնատար անձանց օրինական պահանջներն իրենց գործունեությամբ մաքսային գործին առնչվող անձանց կողմից ենթակա են պարտադիր կատարման:

Նույն հոդվածի 3-րդ մասի համաձայն՝ Մաքսային մարմինների և դրանց պաշտոնատար անձանց օրինական պահանջները չկատարելը հանգեցնում է օրենքով սահմանված պատասխանատվության:

«Մաքսային կարգավորման մասին» ՀՀ օրենքի 301-րդ հոդվածի համաձայն՝ մաքսային կանոնների խախտում է համարվում անձի կատարած անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի

Հանրապետության միջազգային պայմանագրերով Հայաստանի Հանրապետության պետական սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենքով նախատեսված է պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

«Մաքսային կարգավորման մասին» ՀՀ օրենքի 302-րդ հոդվածի 2-րդ մասի համաձայն՝ Մաքսային մարմնի պաշտոնատար անձի՝ մաքսային ոլորտին վերաբերող օրինական պահանջը չկատարելը՝ առաջացնում է տուգանք՝ հարյուր հազար դրամի չափով:

Գործի փաստական հանգամանքների և կիրառման ենթակա իրավական նորմերի համադրված վերլուծությունը փաստում է, որ Սամվել Հարությունի Շիրինյանը չի ենթարկվել մաքսային մարմնի պաշտոնատար անձի՝ մաքսային ոլորտին վերաբերող օրինական պահանջին, որը ամրագրված է ինչպես Արձանագրությամբ, այնպես էլ վերջինիս կողմից տրված բացատրությամբ, ինչը հանգեցրել է Սամվել Հարությունի Շիրինյանի կողմից «Մաքսային կարգավորման մասին» ՀՀ օրենքի 302-րդ հոդվածի 2-րդ մասով նախատեսված մաքսային կանոնների խախտման:

Հիմք ընդունելով վերոգրյալը և ղեկավարվելով «Մաքսային կարգավորման մասին» ՀՀ օրենքի 322-րդ հոդվածով, 334-րդ հոդվածի 1-ին մասի 1-ին կետով և Վարչական իրավախախտումների վերաբերյալ ՀՀ օրենսգրքի 32-րդ և 234-րդ հոդվածներով՝

Ո Ր Ո Շ Ե Ց՝

1. Սամվել Հարությունի Շիրինյանին ենթարկել վարչական պատասխանատվության «Մաքսային կարգավորման մասին» ՀՀ օրենքի 302-րդ հոդվածի 2-րդ մասով և նրա նկատմամբ նշանակել տուգանք **100,000 ՀՀ դրամի** չափով:

2. Սույն որոշումը «Մաքսային կարգավորման մասին» ՀՀ օրենքի 334-րդ հոդվածի 2-րդ մասի համաձայն՝ ուժի մեջ է մտնում կայացման պահից և ուժի մեջ մտնելուց հետո երկամսյա ժամկետում կարող է բողոքարկվել վերադաս մաքսային մարմին կամ ՀՀ վարչական դատարան:

Ծանոթություն. Սույն որոշմամբ նշանակված քույժի գումարը ենթակա է վճարման Կենտրոնական գանձապետարանի №900005024055 հաշվեհամարին 90 ծածկագրով: Սույն որոշումն անբողոքարկելի դառնալուց հետո «Վարչարարության հիմունքների և վարչական վարույթի մասին» օրենքի 88-րդ հոդվածով սահմանված կարգով և ժամկետներում ուղարկվում է Հայաստանի Հանրապետության հարկադիր կատարումն ապահովող ծառայություն: Եթե առկա են վերցված ապրանքներ, դրանք վերադարձվում են «Մաքսային կարգավորման մասին» ՀՀ օրենքի 335-րդ հոդվածով սահմանված կարգով և ժամկետներում:

ՀՀ ՊԵԿ ԱՐԵՎՄՏՅԱՆ

ՄԱՔՍԱՏՈՒՆ-ՎԱՐՉՈՒԹՅԱՆ ՊԵՏ

ԳԱՐԻԿ ՄԻՆԱՍՅԱՆ

